

Inatsissatut siunnersuummut nassuiaatit

Nalinginnaasumik nassuiaatit

1. Aallaqqaasiut

1.1. Naalakkersuisut siulittaasuata oqaaseqarsinnaatitaaneranut tunngatillugu siunnersuummut tunuliaqutit pingaarnerit

Siusinnerusukkut suleriaatsimi aalajangersarneqarsimavoq Naalakkersuisunut ilaasortat oqaaseqarsinnaatitaassasut tamanna kissaatigigaangamikku.

2008-imi Suleriaatsimut Ataatsimiititaliap siunnersuuteqarneratigut aalajangersagaq tamanna atorunnaarsinneqarpoq. Suleriaatsimut Ataatsimiititaliaq taamanikkut isumaqarpoq Naalakkersuisunut ilaasortat saqqummiussisutit, akissuteqaatit naggataarutaasumillu oqaaseqaatit saqqummiunneqarnissaannut piffissaliunneqarsimasut saniatigut Inatsisartunut ilaasortat naligalugit oqallinnermut peqataasinnaasariaqartut – tassa taamaallaat periarfissaqarlutik malitsitut apeqqutinik/oqaaseqaatinik minuttinik marlunnik sivisussusilinnik aalajangersimasunik amerlassusilinnik saqqummiussinissaminnut.

Taamaattoq Inatsisartut 2016-imi ukiakkut ataatsimiinnerminni aalajangiiffigisassatut siunnersuummik (UKA2017/40) akuersissuteqarput, tassuuna Inatsisartut Siulittaasoqarfiat peqquneqarluni Inatsisartut Suleriaasiannut allannguutissatut siunnersuuteqarnissaminut, Naalakkersuisut Siulittaasuata qaqugukkulluunniit oqaaseqarsinnaatitaanissaanik periarfissiisumik.

Suleriaatsip allanngortinneqarnissaanut siunnersuutikkut matumuuna Inatsisartut aalajangernerat tamanna ilaannakuusumik naammassineqarpoq. Taamaalilluni siunnersuutikkut Naalakkersuisut Siulittaasuata periarfissinneqarpoq oqaluuserisassani immikkoortuni ataasiakkaani isumaqatigiinniarnert naggasernissaannut, isumaqatigiinniarnert immikkut taamatut pissutissaqartitsigaangata.

Aalajangiiffigisassatut siunnersuut pillugu isumaliutissiisummini Suleriaatsimut Ataatsimiititaliap Siulittaasoqarfimmu kaammattuutigaa aalajangiiffigisassatut siunnersuutip timitalerneqarnissaanut atatillugu isumaliutigeqqullugu Naalakkersuisut Siulittaasuata oqaaseqarsinnaanissaanik siunnersuut qanoq isumaqatigiinniariaatsimut atuuttumut piffissanullu oqaaseqarfusinnaasunut atuuttunut naleqqussarneqarsinnaanersoq.

Aaqqiissutissatut Siulittaasoqarfiup siunnersuutaa kaammattuummik tassannga

tunngaveqarpoq. Inatsisartut aalajangernerata isumaqatigiinniariaatsimut atuuttumut naapertuuttumik timitalerneqarnissaa pisariaqarsimavoq.

1.2. Inatsisartunut ilaasortat najuutinngikkallartarnerannut malittarisassanut tunngatillugu siunnersuummut tunuliaqutit pingaarnerit

Inatsisartunut ilaasortaq najuutinngikkallarnissamut akuerineqarsinnaavoq tulliuuttut tunngavigalugit:

- Ilaasortap nammineq napparsimappat, sivisunerpaamik qaammatsiutit ullui malillugit ullut 14-it napparsimanissaq naatsorsuutigineqarluni.
- Najuunnissamut aporfissaqarpat, assersuutigalugu timmisartut ilaaffissat aallanngitsoorneri imaluunniit timmisartut aallarfissaasa kinguartinneqarnera tunngavigalugit.

Inatsisartut suleriaasianni maanna atuuttumi ilanngussami 2-mi § 8-mi aalajangersarneqarpoq najuutinngikkallarnissaq tamatuma saniatigut Siulittaasoqarfimmit akuersissutigineqarsinnaasarpoq *ilaasortap napparsimanermut pissutissaqavissumilluunniit akornuserneqarluni najuutinnginneranut assersuunneqarsinnaasumik pingaaruteqartutut pisoq tunngaveqartoq Siulittaasoqarfiup nalilerpagu.*

Siulittaasoqarfiup nalilerpaa najuutinngikkallarnissamik qinnuteqarnermi pisut taaneqartutut ittuunngitsut pineqarnerini itigartitsineq siunertamut naapertuutinngitsumik aalajangiinerusinnaasoq, najuutinngikkallarnissamilli qinnuteqaatit akuersissutigineqarsinnaaneri § 8-mi atuuttumi allassimasut aallaavigalugit oqaasertaliussat nalornisitsisut Siulittaasoqarfik naliliivoq.

Najuutinngikkallarnissamik qinnuteqaateqarnermut assersuutigalugu Inatsisartunut ilaasortap ernermi imaluunniit panimi apersortinnerani najuukkusunnini, imaluunniit aapparisaq napparsimavimmi uninnganerata nalaani qitornarisaminnik paarserusunnini tunngavilersuutigisinnaavaa.

Taama pisoqartillugu assingusunilluunniit pisoqartillugu Siulittaasoqarfiup najuutinnginnissat annertussulikkamik akuersissutigisinnaasarpai. Akuersissuteqartarnermili Siulittaasoqarfiup ersarissakkanik tunngavissaqarnissi maanna kissaatigaa.

2. Inatsisissatut siunnersuummi immikkoortut pingaarnerit

a) Inatsisut atuuttut

Naalakkersuisut Siulittaasuata oqaaseqarsinnaatitaanera

Piffissat oqaaseqarfiusinnaasut atuuttut inatsisissatut siunnersuutit, aalajangiiffigisassatut siunnersuutit aamma apeqquteqaat aallaavigalugu oqallinnissamik siunnersuutit oqaluuserineqarnerini Naalakkersuisunik oqaaseqarsinnaatitaatsippat saqqummiussissutit akissuteqaatillu saqqummiunneqarnerinut, kiisalu naggataarutaasumik oqaaseqaateqarnissamut, taamatullu aamma Inatsisartunut ilaasortanit apeqqutit oqaaseqaatilluunniit akissuteqarfigineqarnerinut atatillugu.

Tamatuma saniatigut Naalakkersuisut Siulittaasuat (Naalakkersuisunullu ilaasortat allat) tunngaviumik Inatsisartunut ilaasortat allat kikkulluunniit naligalugit oqaaseqartumut siunnersuuteqartumulluunniit apeqquteqarnissaminnut oqaaseqaateqarnissaminnuulluunniit periarfissaqarput. Piffissalli oqaaseqarfiusinnaasut pillugit malittarisassani partiit ataasiakkaat Naalakkersuisullu apeqqutigisinnaasaat qummut killilerneqarsimapput. Taamaattumik Naalakkersuisut Siulittaasuat oqaaseqartumut siunnersuuteqartumullu apeqquteqarniarpat oqaaseqaateqarniarpalluunniit, tamanna Naalakkersuisunut ilaasortanut tamarmiusunut apeqqutigineqarsinnaasutut killiliussat iluanni pisariaqassaaq.

Inatsisartunut ilaasortat najuutinngikkallartarnerinut malittarisassat

Inatsisartut suleriaasiannut ilanngussami 2-mi malittarisassani atuuttuni sulinnigiffeqarneq najuutinngikkallarnerlu immikkoortinneqarsimapput.

Inatsisartunut ilaasortap sulinnigiffeqarnissaa akuersissutigineqarsinnaavoq makkununga atatillugu:

- Naartuneq, ernineq imaluunniit meeravissartaarnej.
- Qanigisaq toqkkut qimagunera imaluunniit peruluppat.
- Naalakkersuisunut ilaasortatut, Folketingimut ilaasortatut imaluunniit kommunalbestyrelsimut ilaasortatut, borgmesteritut borgmesterillu tulliatut ilanngullugit, suliassanik nakkutiginnineq.
- Nammineq nappaateqarneq, ilaasortap suliassanik nakkutiginnissinnaaneramik akornutaasumik kinguneqarpat piffissamilu ullunik 14-inik sivisunerusussatut naatsorsuutigineqartumi napparsimaneq.

Taaneqartut saniatigut Inatsisartunut ilaasortat aatsaat najuutinnginnissamik akuersissuteqarfigineqarsinnaapput, tamatumani suliassat nukinginnarluinnartuusut assingusulluunniit pineqartillugit.

Inatsisartunut ilaasortanut najuutinngikkallarnissamik qinnuteqaatit akuersissutigineqarsinnaapput tulluuttut tunngavigalugit:

- Nammineq nappaateqarneq, ullunik 14-inik sivisunerusussatut naatsorsuutigineqartumi napparsimaneq.
- Najuussinnaannginneq, assersuutigalugu timmisartut ilaaffissat aallanngitsoorneri imaluunniit timmisartut aallarfiissaasa kinguartinneqarnera tunngavigalugit.

Taaneqartut saniatigut najuussinnaannginnermut qinnuteqaatit Siulittaasoqarfiup naliliinera najoqqutaralugu aatsaat tunniunneqarsinnaasarput *ilaasortap napparsimanermut pissutissaqavissumilluunniit akornuserneqarluni najuutinnginneranut* atatillugu.

b) Siunnersuut

Naalackersuisut Siulittaasuata oqaaseqarsinnaatitaanera

Siunnersuutigineqarpoq Naalackersuisut Siulittaasuata periarfissinneqassasoq oqaluuserisassani immikkoortup naammassineqannginnerani oqaaseqartussatut kingullertut oqaluuserisassani immikkoortut ataasiakkaat pillugit isumaqatigiinniarnert naggasertarnissaannut. Piffissat oqaaseqarfiusinnaasut nutaamik oqaasertalerneqarnissaannut siunnersuummi tamatumunnga minuttit marluk immikkoortinneqarput.

Taamatut siunnersuuteqarnermi aallaavigineqarpoq Naalackersuisut Siulittaasuata isumaqatigiinniarnert naggaserlugit oqaaseqarsinnaatitaalernissaa nalinginnaasumik atorneqassanngitsoq, taamaallaalli isumaqatigiinniarnert tamatumunnga immikkut pissutissaqalersitsigaangata atorneqartassasoq.

Naalackersuisut Siulittaasuata naggataarutaasumik oqaaseqarneranut atatillugu partiit oqaaseqartartui siunnersuutikkut periarfissinneqanngillat oqaaseqaateqarnissaminnut apeqquteqarnissaminnuunniit.

Inatsisartunut ilaasortat najuutinngikkallartarnerannut malittarisassat

Siunnersuutikkut suleriaatsimut ilanngussami 2-mi § 8 erseqqissarneqarpoq. Siunnersuutigineqarpoq § 8 ima oqaasertalerneqassasoq, Siulittaasoqarfik (§ 7-imi allasimasut saniatigut pisut saniatigut pisoqarfiusut pineqartillugit: tassalu ullut 14-it angullugit napparsimaneq imaluunniit najuussinnaannginneq) najuussinnaannginnermik akuersissuteqarsinnaavoq najuussinnaannginnermik qinnuteqaateqarnermi *ilaqutariinnermi pisut oqimaatsut imaluunniit pisut immikkuullarissut tunngavilersuutigineqarpata, Siulittaasoqarfiullu nalilerpagu itigartitsineq naapertuutissanngitsoq.*

Ataani sanilliussilluni takussutissiami allannguutissatut siunnersuutigineqartut takussutissiarineqarput, taamaattorli piffissani oqaaseqarfiusinnaasuni allanguutit

(Siunnersuummi § 1, nr. 1) ilanngunnagit:

Inatsisissatut siunnersuut inatsimmut atuuttumut sanilliullugu	
<i>Oqaasertaliussat atuuttut</i>	<i>Inatsisissatut siunnersuut</i>
	§ 1 Inatsisartut Suleriaasianni ulloq 12. november 2010-meersumi, 22. september 2011-meersunik, 29. maj 2012-meersunik, 28. maj 2015-imeersunik aamma 1. juni 2016-imeersunik allannguutitalimmi, makku allanngortinneqassapput:
<p>§ 8. Pisunut § 7-imi taaneqartut ittuunngitsunut atatillugu najuutinngikkallarnissamut Inatsisartut Siulittaasoqarfiat akuersissuteqarsinnaavoq, tamanna Inatsisartunut ilaasortap napparsimaneranut pissutissaqavissumilluunniit akornuserneqarluni najuutinnginneranut assersuunneqarsinnaasumik pingaaruteqartut pisoq Siulittaasoqarfiup nalilerpagu. Aalajangersagaq taanna malillugu akuersissut taamaallaat siumut isigisumik nalunaarutigineqarsinnaavoq.</p>	<p>2. Ilanngussaq 2-mi § 8 ima oqaasertaqassaaq: ” § 8. Pisuni § 7-imi taaneqartut avataaniittuni ullut 14-it tikillugit najuutinngikkallarnissamut Inatsisartut Siulittaasoqarfiat qaqutiguuvissumik akuersissuteqarsinnaavoq, taamatut qinnuteqarneq ilaqutariinnermi isiginiagassanik pingaarutilinnik imaluunniit immikkut pissutsinik allanik tunngavilersorneqarsimappat, siulittaasoqarfiullu nalilerpagu qinnuteqaatip itigartinneqarnissaa naapertuutissanngitsoq. Aalajangersagaq taanna malillugu akuersissut taamaallaat siumut isigisumik nalunaarutigineqarsinnaavoq. ”</p>
	§ 2 Allannguutit 1. januar 2018 atuutilissapput.

3. Pisortanut aningaasatigut allaffissornikkullu kingunerisassai

Siunnersuutip pisortanut aningaasatigut allaffissornikkullu kinguneqarnissaa naatsorsuutigineqanngilaq.

4. Inuussutissarsiornermut aningaasatigut allaffissornikkullu kingunerisassai

Siunnersuutip inuussutissarsiornermut aningaasatigut allaffissornikkullu kinguneqarnissaa naatsorsuutigineqanngilaq.

5. Avatangiisinut pinngortitamut innuttaasullu peqqissusiannut kingunerisassai

Siunnersuutip avatangiisinut, pinngortitamut inuiaallu peqqissusiannut kinguneqarnissaa naatsorsuutigineqanngilaq.

6. Innuttaasunut kingunerisassai

Inatsisissatut siunnersuutip innuttaasunut kinguneqarnissaa naatsorsuutigineqanngilaq.

7. Allatigut annertuunik kingunerisassai

Siunnersuutip allatigut annertuunik kinguneqarnissaa naatsorsuutigineqanngilaq.

8. Oqartussaasunik suliniaqatigiiffinnillu il.il. tusarniaaneq

Inatsisissatut siunnersuut tusarniaassutigineqarnikuunngilaq, suliffeqarfiup iluani pissutsinuinnaq attuumassuteqarmat.

Siunnersuummi aalajangersakkat ataasiakkaanut nassuiaatit

§ 1-imut

Nr. 1-imut

Oqaluuserisassani immikkoortup naammassinnginnerani oqaaseqartutut kingullertut oqaluuserisassani immikkoortut ataasiakkaat pillugit isumaqatigiinniarnit naggasersinnaanissaannut Naalakkersuisut Siulittaasuat periarfissinneqassasoq siunnersuutigineqarpoq.

Taamatut siunnersuuteqarnermi aallaavigineqarpoq Naalakkersuisut Siulittaasuata isumaqatigiinniarnit naggaserlugit oqaaseqarsinnaatitaalernissaa nalinginnaasumik atorpeqassanngitsoq, taamaallaalli isumaqatigiinniarnit tamatumunnga immikkut pissutissaqalersitsigaangata atorpeqartassasoq.

Naalakkersuisut Siulittaasuata naggataarutaasumik oqaaseqarneranut atatillugu partiit oqaaseqartartui siunnersuutikkut periarfissinneqanngillat oqaaseqaateqarnissaminnut apeqquteqarnissaminnulluunniit. Isumaqatigiinniarnit naggasernissaannut Naalakkersuisut Siulittaasuata immikkut oqaaseqarsinnaatitaanera / pisinnaatitaanera tamanna isiginiarlugu atorpeqartariaqarpoq. Taamaalilluni oqaaseqarsinnaatitaaneq atorpeqartariaqanngilaq partiit

ilaasortalluunniit, piffissani oqaaseqarfiusinnaasuni akissuteqarnissaminnut periarfissaqanngitsut, sakkortuumik isornartorsiuinissamut.

Nr. 2-mut

Aalajangersakkap kingunerissavaa Siulittaasoqarfiup (§ 7-imi ilanngussaq 2-mi pisut ilanngunneqartut saniatigut pisut: pineqarlutik napparsimanerit ullut 14-it tikillugit sivilissuseqartut imaluunniit najuussinnaannginnerit) nalunaarutigisinnaavaa najuutinnginnissamik akuersissuteqarneq tunniunneqartoq, najuussinnaannginnermut ilaqutariinnermi isiginiagassanik pingaarutilinnik imaluunniit immikkuullarissunik allanik tunngavilersorneqarsimappat, siulittaasoqarfiullu nalilerpagu qinnuteqaatip itigartitsissutigineqarnissaa naapertuutissanngitsoq.

Ilaqutariinnut sunniutissat imaluunniit pisuni immikkut ittuni pissutsit atuuttut qinikkatut pisortanillu toqqakkatut sulinermi suliassanik pisussaaffinnik eqquutitsisussaanerillu siulittaasoqarfiup nalilersuinermini ilanngutissavai, siulittaasoqarfiullu qinnuteqaatip itigartitsissutigineqarnissaa naapertuutissannginnersoq nalilersussallugu.

Najuutinngikkallarnissamik qinnuteqaateqarnermut atatillugu aalajangersagaq assersuutigalugu Inatsisartunut ilaasortap ernermi imaluunniit panimi apersortinnerani najuukkusunnini, imaluunniit aapparisaq napparsimavimmi uninnganerata nalaani qitornarisaminnik paarserusunnini tunngavilersuuteqarnerani atorneqarsinnaavoq.

Najuutinngikkallarnermut atatillugu aningaasartuutaajunnartut maannamutut ilaasortamit pineqartumit namminermit matussuserneqartassapput. Ilaasortap, ass. Sisimiuni panimmi apersortinnissaanut peqataajartorluni ataatsimiinnermit najuutinngikkallarnissaminik akuerineqarsimasup, taamaalilluni timmisartumut unnuinerminnullu aningaasartuutit nammineq akilertariaqassavai, soorlu aamma ilaasortaq piffissami najuutinnginnermini ullormusiaqassanngitsoq.

§ 2-mut

Aalajangersakkami siunnersuutip atuutilerfissaa taaneqarpoq.